

籌辦夷務始末

監修總裁官大學士臣文慶等跪

奏為纂輯善辦夷務始末完竣恭摺進

呈仰祈

聖鑒事竊臣館總裁官原任協辦大學士杜受田面奉

諭旨纂輯善辦夷務始末一書臣等督同編校各官慎司編輯  
細心校勘自道光十六年議禁鴉片煙始至二十九年曠  
夷不進粵城通商受撫止先後十四年間恭奉

上諭

廷寄以及中外臣工之摺奏下至華夷往來之照會書札凡  
有涉於夷務而未盡載入

實錄者編年紀月按日詳載期於無冗無遺欽惟我

宣宗成皇帝如天之度丕冒海隅犯順則赫濯有加乞撫則羈縻

弗絕

雷霆雨露無非

愛育黎元終至

化被重洋蒼生胥登衽席

德威之盛周浹寰區而

宵旰憂勤柔遠保民之念洵足以昭垂萬古矣

皇上特命館臣纂輯成書所以誌

聖謨之默運期海宇之久安遠略宏規至賅且備臣等編摩幸與

感服彌深仰

乾坤燾載之仁包函無外欽

日月照臨之智經畫咸周鯨浪胥恬永觀款關而效順鴻篇載輯  
允資考鏡於前聞共書八十卷裝潢十六函敬謹進

呈伏祈

皇上聖鑒謹

奏

咸豐六年九月

日

監修總裁官大學士臣文慶

總裁官吏部尚書臣花沙納

總裁官戶部尚書臣朱鳳標

總裁官兵部尚書臣阿靈阿

總裁官刑部尚書臣趙光

副總裁官協辦大學士部書 臣彭蘊章

副總裁官兵部尚書 臣周祖培

副總裁官吏部左侍郎 臣瑞 常

副總裁官吏部右侍郎 臣穆 蔭

蒙古副總裁官都察院副御史 臣雙 福

籌辦夷務始末凡例

一原任協辦大學士杜受田面奉

諭旨纂輯夷務一書斷自道光十六年議禁鴉片煙始訖於道光二十九年喫夷不遑粵城通商受撫前後十四年間凡內閣軍機大臣所奉

諭旨內外臣工摺奏下至外國夷書義民信札凡有關於夷務者編年紀月以次備書非徒詳往事之是非實以資異時之考證

一書中所載

諭旨

諭內閣者十之二三

諭軍機大臣者十之七八實以軍興之際沿海用兵均勞  
廟算而一時權宜之計有未經纂入

實錄

聖訓者志載此書

一內外摺件奉有

硃批者先載

硃批後載

諭旨惟

硃批另有旨即有旨者既經恭載



諭旨其

硃批另有旨即有旨字樣一律恭節旁註

硃批及

硃筆圈點勒抹悉照原摺恭載並標明

硃批

硃筆字樣至

硃批字句既遵

實錄之例以墨筆繕寫其

硃筆圈點勒抹自應一體以墨筆恭代

一明發

諭旨標明

諭內閣字樣

廷寄

諭旨標明

諭軍機大臣等字樣同日連奉

諭旨數道標明又

諭字樣均係遵照

實錄

聖訓之例至一

諭而分寄各省者恭照

實錄祇載一條標明各將軍督撫字樣以歸簡明

一

諭旨中所諭之人未經標明名姓但稱該大臣該將軍督撫者恭

照

實錄之例添入寄

諭某某字樣以清眉目

一軍興之際羽檄頻仍內而

廟畧指揮每多密寄外而軍前調度亦用密陳往往事涉機權不  
登冊檔書中每有原摺未見而

諭旨詳及者又有

諭旨未見而摺內恭述者錯綜互見足備參稽

一疆吏奏章准駁均經臚載其奉

旨交軍機大臣會同該部議奏者覆奏亦經詳載惟僅交該部議奏者多係照例之事該部俱有冊檔覆奏概未載入

一各省

欽差大臣及沿海督撫照會夷酋公文有關籌辦機宜者一併附載  
英夷所投夷書暨各國夷書類皆不通文義索解綦難擇其稍有關係者照原文附錄於各摺之後以存其實

一內外摺奏或書單銜或列會銜均照原摺繕寫其會銜人名太多遇有接連數摺者其銜名勢難盡列括以等字

一人而接連數摺者標以又字以免冗複

一內外摺奏遇有字句錯誤又冊檔中鈔寫偶訛者詳考更正其因差務而旁及他事立言過冗者間行刪節以求

簡明

一摺奏中雙擡字樣原係當時臣工體制現在奉

旨纂輯已在咸豐年間自未便照舊書寫恭查道光元年

欽定新疆識畧一書所載

先朝奏章凡遇雙擡字樣一律三擡茲謹用其例凡雙擡者改作

三擡至如跪奏具奏等字摺中例擡奏字茲既纂輯成書

與當時繕摺體例畧有不同謹依

實錄之式概不擅寫

一纂修

實錄

聖訓凡遇

先朝廟諱敬缺末筆此書摺奏居多體例微有不同遇有

宣宗成皇帝廟諱謹遵咸豐四年

諭旨概以甯字恭代

一各館進

御書籍理宜釐正字體惟閩廣各省人名地名多有俚俗稱呼

摺奏中沿用俗字者各仍其舊以昭核實

一各館進

御書籍向俱分出句讀此書遵用成例印出句圈讀圈以便省覽

一

起居注及軍機處冊檔臚載

諭旨標明某年月日不書甲子內外奏摺亦然惟現在纂輯成書與冊檔體例不同恭照

實錄

聖訓之例凡原檔標題某日者一律改書甲子

一西域文字每於字旁加口嘆味各夷人名地名亦往往

加寫口旁然外省摺奏間有不同如佛啣哂佛蘭西或從  
口或不從口至夷酋伯麥義律諸名並不從口其有同此  
一人一地而稱名彼此不同如唃唯喇亦作明唯拉噠  
噠時亦作噠啤吐諸如此類不一而足自因各省譯音偶殊  
文字因之而異各從其舊以免紛更



籌辦夷務始末目錄

卷一

道光十六年四月己卯至十七年九月戊戌

卷二

道光十八年正月庚辰至五月己巳

卷三

道光十八年六月乙亥至癸巳

卷四

道光十八年七月辛丑至八月庚寅

卷五

道光十八年八月辛卯至十九年正月甲子

卷六

道光十九年二月丁卯至四月甲午

卷七

道光十九年五月己亥至七月壬子

卷八

道光十九年八月庚辰至十一月庚子

卷九

道光十九年十二月癸亥至二十年正月丁巳

卷十

道光二十年三月丙申至五月己酉

卷十一

道光二十年六月辛酉至七月丙申

卷十二

道光二十年七月丁酉至庚戌

卷十三

道光二十年七月辛亥至八月丙寅

卷十四

道光二十年八月丁卯至庚辰

卷十五

道光二十年八月辛巳至九月癸卯

卷十六

道光二十年九月乙巳至十月丙戌

卷十七

道光二十年十一月丁亥至丙辰

卷十八

道光二十年十二月戊午至辛未

卷十九

道光二十年十二月癸酉至癸未

卷二十

道光二十一年正月己丑至乙未

卷二十一

道光二十一年正月丁酉至乙巳

卷二十二

道光二十一年丁未至二月庚申

卷二十三

道光二十一年二月辛酉至己巳

卷二十四

道光二十一年二月壬申至甲申

卷二十五

道光二十一年三月丙戌至庚子

卷二十六

道光二十一年三月癸卯至甲寅

卷二十七

道光二十一年閏三月乙卯至辛未

卷二十八

道光二十一年閏三月乙亥至四月丙午

卷二十九

道光二十一年四月戊申至五月己卯

卷三十

道光二十一年六月辛卯至壬子

卷三十一

道光二十一年七月癸丑至辛巳

卷三十二

道光二十一年八月壬午至丙申

卷三十三

道光二十一年八月丁酉至戊申

卷三十四

道光二十一年八月己酉至九月丁巳

卷三十五

道光二十一年九月戊午至庚午

卷三十六

道光二十一年九月壬申至戊寅

卷三十七

道光二十一年十月辛巳至庚寅

卷三十八

道光二十一年十月辛卯至甲辰

卷三十九

道光二十一年十月乙巳至十一月癸亥

卷四十



道光二十一年十一月丁卯至己卯

卷四十一

道光二十一年十二月癸未至癸巳

卷四十二

道光二十一年十二月甲午至己酉

卷四十三

道光二十二年正月辛亥至丙子

卷四十四

道光二十二年二月壬午至丙申

卷四十五

道光二十二年二月丁酉至三月壬子

卷四十六

道光二十二年三月乙卯至丙子

卷四十七

道光二十二年四月庚辰至壬辰

卷四十八

道光二十二年四月甲午至甲辰

卷四十九

道光二十二年四月乙巳至五月癸丑

卷五十

道光二十二年五月乙卯至癸亥

卷五十一

道光二十二年五月甲子至庚午

卷五十二

道光二十二年五月辛未至六月戊寅

卷五十三

道光二十二年六月己卯至乙酉

卷五十四

道光二十二年六月丙戌至壬辰

卷五十五

道光二十二年六月癸巳至丁酉

卷五十六

道光二十二年六月己亥至癸卯

卷五十七

道光二十二年六月甲辰至七月庚戌

卷五十八

道光二十二年七月辛亥至壬戌

卷五十九

道光二十二年七月癸亥至八月庚辰

卷六十

道光二十二年八月辛巳至九月癸丑

卷六十一

道光二十二年九月甲寅至甲戌

卷六十二

道光二十二年十月己卯至癸卯

卷六十三

道光二十二年十一月乙巳至乙丑

卷六十四

道光二十二年十一月丙寅至十二月辛丑

卷六十五

道光二十三年正月辛亥至二月癸卯

卷六十六

道光二十三年三月庚戌至六月甲申

卷六十七

道光二十三年七月乙巳至甲子

卷六十八

道光二十三年七月丁卯至八月丁卯

卷六十九

道光二十三年九月壬申至癸巳

卷七十

道光二十三年十月己酉至十二月庚申

卷七十一

道光二十四年正月丙戌至五月甲戌

卷七十二

道光二十四年六月戊戌至九月辛卯

卷七十三

道光二十四年十月乙未至十二月庚戌

卷七十四

道光二十五年正月壬申至十二月己酉

卷七十五

道光二十六年正月己卯至閏五月丙午

卷七十六

道光二十六年六月戊午至九月甲辰

卷七十七

道光二十六年十月戊辰至二十七年壬寅

卷七十八

道光二十七年五月己亥至十二月甲戌

卷七十九

道光二十八年正月乙酉至二十九年三月庚寅

卷八十



道光二十九年四月辛丑至十二月庚午

籌辦夷務始末卷之一

道光十六年丙申四月己卯太常寺少卿許乃濟奏鴉片  
煙本屬藥材其性能提神止洩辟瘴見明李時珍本草綱  
目謂之阿芙蓉惟吸食既久則食必應時謂之上癮廢時  
失業相依為命甚者氣弱中乾面灰齒黑明知其害而不  
能已誠不可不嚴加厲禁以杜惡習也查鴉片之類有三  
一曰公班皮黑色亦謂之烏土出明推喇一曰白皮出孟  
買一曰紅皮出曼達喇薩皆喫咭喇屬國乾隆以前海關  
則例列入藥材項下每百斤稅銀三兩又分頭銀二兩四  
錢五分其後始有例禁嘉慶初年食鴉片者罪止枷杖今

遞加至徒流絞監候各重典。而貪者愈眾。幾徧天下。乾隆以前鴉片入關納稅後。交付洋行兌換茶葉等貨。今以

功令森嚴。不敢公然易貨。皆用銀私售。嘉慶年間。每歲約來數百箱。近竟多至二萬餘箱。每箱百斤。烏土為上。每箱約價洋銀八百圓。白皮次之。約價六百圓。紅皮又次之。約價四百圓。歲售銀一千數百萬圓。每圓以庫平七錢計算。歲耗銀總在一千萬兩以上。夷商向攜洋銀至中國購貨。沿海各省民用頗資其利。近則夷商有私售鴉片。價值無庸。扶資由是洋銀有出而無入矣。

國家承平垂二百年。休養生息。財帛充牣。我

皇上躬行節儉為天下先宜乎黃金與土同價矣。然向來紋銀每兩易制錢千文上下。比歲每兩易錢至千二三百文。銀價有增無減。非銀有偷漏而何。以中原易盡之藏填海外。無窮之壑日增月益。貽害將不忍言。或欲絕夷人之互市。為拔本塞源之說。在

天朝原不惜捐此百餘萬兩之稅餉。然西洋諸國通市船者千有餘年。販鴉片者止嘆咭喇耳。不能因絕嘆咭喇。並諸國而絕之。瀕海數十萬眾恃通商為生計者。又將何以置之。且夷船在大洋外。隨地可以擇島為廛。內洋商船皆得而至。又烏從而絕之。比歲夷船周歷閩浙江南山東天津奉

天各海口。其意即在銷售鴉片。雖經各地方官當時驅逐。然聞私售之數亦已不少。是雖絕粵海之互市。而不能止私貨之不來。或謂有司官查禁不力。致令鴉片來者日多。然法令者。胥役棍徒之所藉。以為科法愈峻。則胥役之賄賂愈豐。棍徒之計謀愈巧。道光元年。兩廣督臣阮元嚴辦澳門囤戶葉恆樹。夷商無可託足。因自販於零丁洋。其地在蛟門以外。水路四通。有大船七八隻。終歲停泊。收貯鴉片。謂之躉船。有省城包買戶。謂之窩口。由窩口兌價銀於夷館。由夷館給票單。至躉船取貨。有來往護艇。名曰快蟹。亦曰扒龍。破械畢具。亡命數十輩。運槳如飛。所過關卡均

有重賄。遇兵役巡船向捕。輒敢抗拒。互致殺傷。前督臣盧坤調派水師副將秦裕昌香山知縣田溥等。拏獲梁顯業販賣鴉片船隻。起出煙泥一萬四十餘斤。格殺生擒者共數十人。並按治窩口匪犯姚九歐寬等。籍產入官。查辦非不認真。而此風終未能戢。蓋凡民之畏法。不如其驚利鬼。賊伎倆。法令實有時而窮。更有內地匪徒冒充官差。以摻查鴉片為名。乘機搶劫。臣前在廣東署臬司任內。報業紛紛。栽贓訛詐之案。尤所在多有。此等流弊。皆起自嚴禁以後。究之食鴉片者。率皆游惰無志。不足重輕之輩。亦有年逾耆艾而食此者。不盡促人壽命。海內生齒日眾。斷無減

耗戶口之虞。而歲竭中國之脂膏。則不可不大為之防。早為之計。今閉關不可。徒法不行。計惟仍用舊例。准令夷商將鴉片照藥材納稅入關。交行後。只准以貨易貨。不得用銀購買。夷人納稅之費。輕於行賄。在彼亦必樂從。洋銀應照紋銀一體禁其出洋。有犯被獲者。鴉片銷燬。銀兩充賞。至文武員弁。士子兵丁等。或效職從公。或儲材備用。不得任令沾染惡習。致蹈廢時失業之愆。惟用法過嚴。轉致互相容隱。如官員士子兵丁私食者。應請立予斥革。免其罪名。寬之正所以嚴之也。該管上司及保結統轄官。有知而故縱者。仍分別查議。其民間販賣吸食者。一概勿論。或疑

弛禁於政體有關。不知觴酒衽席。皆可戕生。附子烏頭。非無毒性。從古未有一禁之者。且弛禁僅屬愚賤無職事之流。若官員士子兵丁。仍不在此數。似無傷於政體。而以貨易貨。每年可省中原千餘萬金之偷漏。孰得孰失。其事瞭然。倘復瞻顧遲回。徒徇虛體。竊恐鴉片終難禁絕。必待日久民窮財匱。而始轉計。則已悔不可追。伏乞

皇上密飭粵省督撫及海關監督。確查以上各情節。如果屬實。速議變通辦理。庶足以杜漏卮而裕

國計。

許乃濟又奏。臣更有請者。鴉片煙土。係用罌粟花結苞時



刺取津液熬鍊而成閩廣浙東雲南向有栽種罌粟製造鴉片者疊經科道各官奏請嚴禁內地遂無人敢種夷人益得居奇而利藪全歸外洋矣其實中原土性和平所製價廉力薄食之不甚傷人上癮者易於斷絕前明淡巴菘來自呂宋即今之旱煙性本酷烈食者欲眩先亦有禁後乃聽民間吸食內地得隨處種植呂宋之煙遂不復至食之亦竟無損今若寬內地民人栽種罌粟之禁則煙性平淡既無大害且內地之種日多夷人之利日減迨至無利可牟外洋之來者自不禁而絕特慮奪南畝之地力荒農夫之耕作則關繫匪輕但以臣所聞廣東省情形言之九

月晚稻刈獲既畢始種罌粟南方氣暖二三月便已開花結實收漿後乃種早稻初無礙於地力而大有益於農夫應請

敕查各省舊種罌粟處如果於早晚兩稻均無妨礙亦准聽民之便庶外洋無奇可居而夷舶之私售鴉片者久之可以漸絕辛巳

諭軍機大臣等據太常寺少卿許乃濟奏鴉片煙例禁愈嚴流弊愈大近年以來夷商不敢公然以貨易貨皆用銀私售每歲計耗內地銀一千萬兩之多請變通辦理仍准其以貨易貨等語著鄧廷楨會同妥議具奏原摺鈔給閱看將此諭令鄧廷楨祁

墳並傳諭文祥知之。

九月壬午兩廣總督鄧廷楨廣東巡撫祁墳粵海關監督文祥奏竊臣等於道光十六年五月十九日承准軍機大臣字寄四月二十九日奉

上諭據太常寺少卿許乃濟奏鴉片煙例禁愈嚴流弊愈大近年以來夷商不敢公然易貨皆用銀私售每歲計耗內地銀一十萬兩之多請變通辦理仍准其以貨易貨等語著鄧廷楨等會議具奏等因欽此仰見我

皇上軫念民生勤求利弊之至意臣等伏思立制貴乎因時為政先宜除弊若除弊而弊益甚則不得不籌變通竊惟鴉片

一物來自外夷流入中國歷有年所雍正乾隆年間載在海關則例列入藥材項下原無禁止販賣吸食之例迨嘉慶四年前督臣覺羅吉慶議以外夷之泥土易中國之貨銀殊為可惜且恐內地人民輾轉傳食廢時失業奏請不許販賣犯者擬罪遞加至徒流環首立法不為不嚴無如民之畏法不如其驚利自奉禁以後奸徒狡焉思逞日漸增多或躉船攬貯於外洋或窰口潛藏於內地或快蟹扒龍等艇飛棹走私或棍徒藉口稽查肆意訛搶其初本尋常之物市井吸食無所顧忌值亦甚廉今則禁令愈嚴私販愈巧每年所耗內地銀兩為數愈益不貲臣等細核原

奏臚陳時弊均屬實在情形所請弛禁變通辦理仍循舊制征稅係為因時制宜起見似應請

旨准照原奏嗣後如有外夷貿易帶有鴉片准令該夷商人關報稅仍照乾隆以前海關則例定額征收並同別項呢羽等貨一體交與洋行祇准以貨易貨不得用銀私售由此實力遵行遞年可免中國千萬餘金之漏卮洵屬清源截流之急務而稅額輕於行賄偷越之弊不戢自消興販等諸常貨詐擾之風不禁自絕閭閻省無窮之訟獄即犴狴少若干之罪囚況官員士子兵丁仍限以制不准吸食犯者立予斥革其民間販賣吸食者一概勿論使知耽嗜者皆

暴棄自甘之輩。不齒於衣冠文物之中。愧悔既生。消除自  
力。誠如原奏。亦無傷於政體。如蒙

俞允弛禁通行。實於

國計民生。均有裨益。惟立法之初。諸須籌計萬全。而禁止紋  
銀出洋一節。尤關緊要。若章程稍未周妥。則不數年而流  
弊又滋。殊非經久之道。臣等公同商榷。謹擬章程九條。另  
繕清單。恭呈

御覽。

一以貨易貨。應計全數抵算。不准影射也。查鴉片弛禁。原  
為杜絕私售。匱財起見。必將夷船鴉片。責成保商協同總商。

核定該價若干。衡量內地之貨。該價若干。銀數相等。彼此以貨全數抵易。不得用銀購買。查

天朝出產。貴重通用貨物。多於外夷數倍。以貨抵貨。有贏無絀。若偶遇所來鴉片過多。所需內地之貨較少。不敷抵算。而夷船即須回帆。則由保商先行收稅代納。其鴉片除易貨外。餘俱起貯該行。該保商眼同夷商核明所存確數。具報監督衙門立案。隨時代銷。銷竣仍與承賣鴉片之商同稟銷案。將來夷商來粵。仍照數以貨抵還。不准借找價之名。私行找給銀兩。仍責成殷實總商。嚴加稽察。於夷船出口時。總保各商加具並無夾帶紋銀切結。呈送查考。如有用

銀私買。或找給價銀者。即據實稟出。從重究懲。並將鴉片入官變價。已經轉賣者。追價入官。如總保各商。通同徇隱。一併究懲。

一水師巡船。及各關口員役。宜責令專在隘口稽查。不准出洋藉詞滋擾也。鴉片雖經弛禁。而商民趨利若鶩。誠恐仍向夷商私相交易。則紋銀偷漏。仍所不免。應責令水師巡船。及各關口員役。實力稽查。遇有私銀出口。即行拏解究辦。所獲銀兩船隻。全數充賞。以示鼓勵。而杜偷越。但紋銀出洋。既有從出之地。亦有必出之途。從出之地。則在附近洋行。必出之途。則在出口要隘。止須認真查察。不慮其



飛渡外洋。若一經出海。則散漫無稽。兵役匪徒藉口巡緝。不但不能扼要。且恐滋生事端。仍應嚴行飭禁。

一洋銀應照舊章。仍准帶回三成。並先確查來銀數目。以杜欺隱也。查夷船向多載運洋銀來粵。以備易貨找價。及回帆水腳之需。如進口貨多。出口貨少。其洋銀即有餘積。勢不能禁其帶回。溯查嘉慶二十三年。前粵海關監督臣阿爾邦阿因夷人帶回洋銀。並無限制。咨經前督臣阮元議。以准其帶回三成。餘聽借給別夷辦貨輸稅。迄今循行無異。茲鴉片來船。或因載運無多。挾貨以圖易貨找價者。亦所不免。似應仍照舊章辦理。惟夷船帶來洋銀為數多。

寡不等。如贖銀十萬圓。自應准其將三萬圓帶回。若贖銀至二十萬圓。即須示以限制。應請嗣後夷船帶來洋銀餘贖至十萬圓者。准其帶回三成。如至二十萬圓以上。無論鴉片及別項貨物船隻。均准令帶回五萬圓為止。不得再溢此數。仍先於該夷船進口報驗時。責成保商查明來銀確數登記。以為將來除用核存。按成給帶之準。並責成總商保商一體實力稽察。倘吏胥人等虛查捏報。嚴拏懲辦。總保各商徇隱舞弊。一併究懲。

一鴉片應與別項洋貨一例交易。不必設局專辦也。查貨殖之道。操贏制餘。各有其術。人棄我取。見亦不同。勢難合

眾情而一之。今鴉片既循舊制，准其入口交易，即屬藥材，與他貨無異。若設立專局經理，恐易啟壟斷居奇之漸，宜聽夷人擇行自報保商，報驗輸稅，毋庸另設公局，庶奸徒不得把持牟利於夷洋兩商，均有裨益。

一、額稅宜遵舊制，不必加增，並嚴禁需索陋規也。查粵海關則例，鴉片每百斤征正稅銀三兩，加一火耗銀三錢，仍照奏定歸公規例，加收擔頭分頭等銀八分六釐。雖鴉片有烏土、白皮、紅皮之分，貴賤不同，而按斤納稅，則統歸一致，誠以稅重則必避稅而走私，稅輕則不肯走私，以冒險而額有一定，胥吏亦免上下其手。前人立法具有深意，今

應仍照舊額輸稅。不必增添。但恐弛禁之初。胥吏夤緣為奸。藉詞索取陋規。則稅輕而陋規轉致倍捷。既失懷柔遠人之意。且必以入口為畏途。仍以走私為得計。應嚴行出示曉諭。正稅之外。不准絲毫需索。違者照蠹役詐贓例究懲。

一價值不必預定也。查貨殖之道。賤之微貴。貴之微賤。理有固然。故價值之低昂。視乎物力之贏絀。與銷售之暢滯。本不能限以定數。今鴉片弛禁之初。驟令貴買賤賣。勢所難行。且人情貴貴物而賤賤物。嚴禁鴉片之時。居奇者每得肆其奸。一經弛禁流通。則是尋常藥材。曩之寶而祕之。

者行且棄之如遺價必日減日賤若預為定價轉致將來窒閼難行所有價值應聽其長落隨時毋庸預定

一內地各省海船運銷鴉片應由粵海關印給執照也查向辦貿易章程無論何省海船置買洋貨一律赴粵海大關請給印照詳註貨物數目不准私買並咨明各省通行查照於各海口嚴行稽查如有海船運回外洋貨物查無海關印照即屬私貨照例究辦船貨入官立法最為周備今鴉片既經弛禁商人承受運銷與洋貨無異應查照舊章凡內地各海船承買鴉片亦投明洋商以貨易貨赴海關請領印照行運即由海關移咨各該省查照庶粵省及

各省海口。均有稽考。可杜內地海船。在外洋向各夷船私買私賣。偷漏銀兩之弊。

一民間栽種罌粟。似可稍寬厲禁也。鴉片之為物。情柔而性剛。情柔則甘之如飴。性剛則易於致病。外夷製造之法。言者不同。大率不能無毒。聞近年內地。間有私造者。不過以罌粟津液。煎熬而成。性稍平易。為害遂輕。與其徒向外夷設法防閑。不若聽令內地。有所抵制。似宜稍寬厲禁。無事嚴查。若恐愚民舍本逐末。妨礙農功。惟應出示曉諭。凡山頭地角。不成邱段處所。准其栽種。不得占種良田。致傷

本計。

一官員士子兵丁宜嚴行飭禁不准吸食也查許乃濟原奏內稱食鴉片者率皆遊惰無志之輩亦有年逾耆艾而食此者不盡促人壽命海內生齒日繁斷無減耗戶口之虞至文武員弁並士子兵丁或效職從公或儲才備用則不得任其沾染習氣致蹈廢時失業之愆等語查用法太嚴則弄法愈巧轉致互相容隱自不如寬其禁令動其廉恥可冀漸知遷改原奏之意申其戒於官員士子兵丁而寬其法於齊民於禁抑之中寓期勉之意亦潛移默化之道應如所議此後民間販賣吸食一概勿論若文武員弁並士子兵丁私賣吸食即立予褫革以為不自振拔者戒

仍行知各省文武衙門嚴飭所屬一體實力遵照若陽奉陰違將該管上司交部議處

十月甲寅江南道御史袁玉麟奏臣惟政有得失治有隆汙要在辨其理之是非事之利害而已是非明利害審而又出之以斷持之以信則令無不行禁無不止今日之弊事事以辦不動三字藉口而其尤為因循遷就者莫如鴉片弛禁之議伏念我

皇上宵旰焦勞無非為

國計民生治益圖治安益求安凡為臣工果恪遵

嚴諭事事求一實字則天下斷無辦不動之事為弛禁之議者特



因紋銀出洋不能嚴行禁絕遂倡此議以圖自便耳而復巧為納稅之說以為禁之有害反不若弛禁之利

皇上燭照如神萬不至墮其術中第臣仰體

聖主勤求上理之懷不敢不竭盡愚忱用效芻蕘之獻竊以為弛禁之議戾於是非者有三。關於利害者有六。請得而敬陳之。何以見其戾於是非也。鴉片禁例載諸

謨訓炳炳烺烺

皇上御極以來尤嚴查禁議者乃欲變易舊章是違

祖制而背

諭旨也其戾於是非者一。

朝廷政令最宜畫一。今吸食鴉片。但禁官弁士兵。不禁小民。不知今日之民。即異日之官弁士兵。將始聽之。而繼禁之乎。今日之官弁士兵。亦有時因事革而為民。將方禁之。而旋聽之乎。又况因有害而禁之。必因無害而後弛之。半禁半弛。先紊其例。而欲奉行無弊難矣。法禁一。功令尚有不遵。法禁紛。刑章安能共守。是壞政體而傷治化也。其戾於是非者。二。海關舊例藥材款下。每鴉片百斤。稅銀三兩。又分頭銀二兩四錢五分。查鴉片每箱百斤。近年約銷售二萬餘箱。計每箱稅銀五兩零。以二萬餘箱計之。不過稅銀十二三萬兩。即加倍取稅。不過二十餘萬兩。再加一倍亦

不過五十餘萬兩而止。然而行不數年。侵隱百端。即此數十萬兩。動多缺額。徒有增稅之名。毫無裕課之實。又何濟乎。

國家經費有常。錢糧關稅鹽課數大端。綜理得宜。帑藏自裕。若必藉鴉片抽稅。是見小利而傷大體也。其戾於是非者。三。此是非之當辨者也。何以見其關於利害也。紋銀出洋。誠為可慮。要視查辦之認真否耳。認真則鴉片之禁。行紋銀出洋之禁。亦自行。不認真則鴉片之禁。弛紋銀出洋之禁。亦自弛。並非鴉片弛禁而後查辦易。嚴禁鴉片而即查辦難也。且臣以為銀之出洋。禁鴉片亦出。不禁鴉片亦出。

也。蓋洋夷之所以市鴉片者，原利我內地之銀耳。今議以貨易貨，決非彼之所欲。勢必陽奉陰違，勾串漢奸，私相交易。仍攬內地之銀以去而後已。試思今之銀禁，何嘗不嚴。乃近年出洋竟至歲逾二十萬兩之多。此時既不能認真查辦，弛禁之後，安望其能認真查辦乎？若專恃關口盤獲銀兩，即以其銀償之，並燒燬鴉片為除偷漏之法，則何不即行之於禁鴉片之時，為更直截。乃必俟鴉片開禁而後行盤銀之法，其見亦左矣。且內地載出之茶葉、大黃等貨，與外夷載入呢羽、鐘表等貨，僅足相抵。今每歲添入二千萬兩銀之鴉片，則內地安得再有二千萬兩銀之貨與之。

相抵貨不足抵必益以銀是仍開門揖盜矣又况一經弛  
禁食者必愈多食愈多銷必愈多銷愈多價必愈昂價愈  
昂則愈無貨與之相抵而銀之出洋且益甚若謂內貴我貨  
外賤彼貨不知貨物久有定價忽欲貴賤由我島夷詭猾  
安肯降心相從祇滋事端更形窒礙可見以貨易貨之說  
皆為飾詞開禁之害彌熾留銀之利莫收是撤藩籬而飼  
虎狼也其間於利害者一謂銷售鴉片費銀無算准令內  
地布種罌粟查罌粟冬種春收冬春之間南方山場雜糧  
最多其田畝則種二麥不等北方之麥開墾民食更大今  
鴉片之利數倍於農小民無知孰不棄農而趨利乎夫以

閭閻自謀身家。則銀貴而穀賤。而為億兆通籌生養。則穀重而銀輕。天下糧田。祇有此數。然而傷穀之事。種蔗栽菸。燒鍋等項。已居十之二三。若更益以鴉片。生齒日滋。而穀產日耗。雖使頻年豐稔。竊恐數分之田糧。終不足養十分之戶口。設遇偏災。其何道以處之。即謂不准妨農。不思既不禁人栽種。又何能不荒廢農田。歲查則騷擾堪虞。不查則種植將徧。膏腴之區。且盡化為鴉片之壤。是奪農功而耗本計也。其閭於利害者。二謂愚民自戕其生。不足深惜。此特局外痛心疾首之言。

皇上如天之仁。何忍一夫不獲。當此嚴禁之時。猶敢私相販食。若

明弛其禁令。公然行之。則父不能教其子。夫不能戒其妻。主不能約其僕。師不能訓其弟。其已食者。習為故常。其未食者。爭相倣效。靡靡昏昏。何所底極。是絕民命而傷元氣也。其關於利害者三。粵東兵丁吸食鴉片。以致兵力脆弱。前排徭滋事時。曾奉

嚴旨切責。今禁兵而不禁民。日後軍糧額缺。招民充補。將現充之兵。既多違禁私吸之患。繼充之兵。又係開禁久吸之民。則雖日禁兵丁。而終無淨禁之日。夫弱一隅之兵力。猶可言也。浸染漸廣。而弱天下之兵力。不可言也。借毒物以疲內地。實屬猾夷故智。今若竟為所愚。是虛捍衛而啟窺伺也。

其關於利害者四。澳門互市設官稽查。具有條約。洋行奸商勾串夷匪。置快蟹之船。設窩口之局。因運鴉片。朋比為奸。至於銀號兌價。夷館給單。種種不法。已極。此時惟有執法嚴辦。庶可免其遷流。今反令其興販。則前此藐法行私。甚為得計。此後更復何所顧忌。是濟奸民而通洋匪也。其關於利害者五。尤有大可慮者。天下之患。莫大於一發而不可收。弛禁之令一下。海內必靡。然從風。迨至禁已開。而害益烈。所謂紋銀出洋諸弊。卒不能除。而且百弊叢生。日甚一日。然後悔弛禁之非。復思有以禁之。而起視天下。已成一積重難返之勢。不禁則橫流靡極。再禁則滋蔓難圖。



是又狃目前而貽後患也。其關於利害者。六此利害之當辨者也。衡之是非。既如彼。絜之利害。又如此。禁之不可弛也。昭昭然矣。顧議者且曰。禁亦何益。與不禁等耳。不知此非法之過。奉法者之過也。今海內承平。而命盜奸宄。案且迭出。不聞以禁之不止。遂並弛其禁也。鴉片流毒更深。獨奈何。一旦寬之。議者又曰。法令愈峻。徒資索詐。不知此風原所不免。要在良有司分別懲辦。豈可因噎廢食。况官弁士兵食者。復不少。所樂得而索詐者。正在此輩耳。議者又曰。淡巴菰昔曾厲禁。後禁寬。食者徧天下。卒無害。鴉片亦宜然。不知淡巴菰雖無益於人。食之尚不至廢事耗神。不

食亦不至發癮生病。何得以例鴉片。議者又曰。禁嚴則賄多。禁弛則賄少。斯言也。出自局外之人。猶為揣度之論。苟出自奉法之吏。則行賄何地。受賄何人。當此整綱飭紀之時。何不從嚴指名叅辦。而反歸咎於嚴禁鴉片乎。夫奉法得人。即禁鴉片而賄自清。奉法非人。即不禁鴉片而賄自恣。議者何未之思也。總之平情而論。議開者非必懷不肖之意。而聊為苟且塞責。其弊遂至無窮。議禁者本力為久遠之謀。而但求執法不移於事。即大有濟。誠得海疆大吏。潔已奉公。忠誠體

國。必能雷厲風行。力清弊源。然後責令各地方官。恪守成規。

嚴行查究。雖不能盡挽澆風。較之公然弛禁。其是非利害。實有判若霄壤者。若以弛禁為轉移。究非良策。惟有願懇宸衷。獨斷察其是非。究其利害。立斥弛禁之議。仍請

敕下在廷諸臣。悉心妥議。於煙入銀出。有可永遠禁絕之方。各陳所見。

皇上擇要而施。益申厲禁之法。慎簡守法之人。俾綱紀肅而網弊除。天下幸甚。萬世幸甚。

道光十七年丁酉正月丙申。兩廣總督鄧廷楨奏。竊查粵東准予外夷各國通商以來。惟暎咭喇國生理較大。向經該國設有公司。派令大二三四班。來粵經理貿易。其公司

夷船每年於七八月間陸續來粵兌換貨物至十二月及次年正二月內出口回國該大班夷商人等於公司夷船出口完竣之後請牌前往澳門居住俟七八月間該國貨船至粵該大班人等復請牌赴省料理此從前歷辦章程也嗣因公司散局大班不來乏人總攝其事經前督臣盧

坤奏奉

諭旨即飭洋商令該散商等寄信回國另派大班前來管理貿易事宜以符舊制等因欽此欽遵飭行在案茲於本年十一月內接據暎夷義律由澳門傳稟內稱准本國公書特派遠職來粵總管本國商賈水捐現在商船進口聚集省城黃

埔等處商梢人等多有未悉

天朝法度誠恐滋事稟乞准其赴省管理等情臣以該夷稟內  
敘稱遠職似係夷目之稱並非大班名目該夷現居該國  
何職來粵是否僅止管束商梢並不經理貿易有無該國  
文憑均未據詳晰聲明當即委員帶領洋商馳赴澳門會  
同該管文武確查去後旋據該委員等稟稱遵飭帶去洋  
商向該夷義律逐一查問據稱義律即噶咭係啖咭喇國  
四等職於道光十四年秋間附搭巡船到澳經引水具報  
有案該夷住澳兩載承辦啖咭喇商船回國船牌簽字現  
因公司未復並無大班奉該國王命一等大臣信知派伊

管理商賈水梢。不管貿易。並有文憑。飭令在省領事。若有商稍滋事不法。惟伊是問等語。並查明該夷義律攜有一妻一子。隨從四人。訪之住澳洋夷。及各國夷商。僉稱義律人杜安靜。並無別故等情。稟覆前來。臣查啖咭喇國公司散局後。大班不來。近年夷商回國。船牌簽字。係該夷義律住澳管理。尚稱安分。現值該國來船絡繹。商船人等實繁。有徒。亟資鈴束。以期綏靜。今該夷既領有該國公書文憑。派令經管商稍事務。雖核與向派大班不符。但名其實。同總之以夷馭夷。不許別有干預。似可量為變通。查照從前大班來粵章程。准其至省照料。臣現已諭令該夷暫居澳。

門聽候據情人奏如蒙

恩准臣再行咨會粵海關監督給領紅牌進省以後住澳住省並照舊章以時往來不准逾期逗留致開盤踞之漸臣仍嚴飭該管文武及洋商等隨時認真訪察倘該夷越分妄為或有勾結漢奸營私亂法立即驅逐回國以絕弊源

諭軍機大臣等據鄧廷楨奏稱暎咭喇國公司散局以後大班不來上年十一月內該國特派遠職來粵總管本國前來貿易之商賈水手等語該國來船絡繹自應鈐束得人以期綏靜今該夷既有公書文憑派令經管商梢事務雖與向派大班名目不同其為鈐束則一著准其依照從前大班來粵章程至省照料並

飭令粵海關監督給領紅牌進省以後住澳住眷一切循照舊章不准逾期逗留致開盤踞之漸該督等正可藉此責成該夷小心彈壓不准干預滋事仍應密飭該管文武及洋商等隨時認真訪察倘該夷越分妄為或有勾結漢奸營私執法情事立即驅逐回國以絕弊端

六月丁巳禮科給事中黎攀鏐奏臣惟沿海各省口岸私運紋銀出洋實屬近來銅弊而粵東為尤甚蓋緣該省為夷船聚集之地其偷漏為較便其防範亦為較難現經兩廣督臣派委員弁拏獲出洋紋銀兩起均經奏請獎勵在案惟是近年夷情貪詐異常奸民又復趨利若鶩情變百



出雖偶有破案。而奸徒敢於走險。終不免有疏脫之時。臣  
愚以為救弊之道。欲塞其流。當清其源源之不清。則其流  
終不可塞。欲清紋銀出洋之源。則必以禁止外夷躉船為  
第一要著。緣每年各國貨船到粵。均在黃埔停泊。其地係  
屬內河。且必經行商出具甘結。始能進口。稽查較易。惟暎  
咭喇國有躉船十餘隻。自道光元年起。每年四五月即入  
急水門。九月後仍回零丁洋。至道光十三年。該夷探知金  
星門水面較穩。遂由急水門改泊金星門。由是鴉片之入  
口紋銀之出口。皆恃躉船為遁逃淵藪。該處海口與香山  
縣最近。匪徒快蟹。朝發夕至。兼之各處港汊。可以偷越者。

甚多。臣故謂躉船不去，則紋銀終難禁其出洋者。此也。惟思西洋各國夷船均係一年一至。互市後便各回帆。即道光元年以前。該國亦未聞私設躉船。何以近年來獨任其終歲在洋而停泊。總由該督撫因循畏葸。務為寬大。以致釀成積重之勢。應責成該省督撫。嚴飭洋商傳諭該國坐地夷人。恪遵

功令。剴切開導。勒令寄泊躉船盡行歸國。無許託故逗留。如果躉船淨絕。則奸民雖欲與之勾通。而該國遠隔重洋。雖有快蟹不能飛渡。仍選擇勤幹廉正之武職大員專駐海口。督率將弁加意巡防。嚴為堵緝。則積弊自可漸清。至向

來紋銀出洋。每次多者數十萬兩。少者亦數萬兩。斷非三五匪徒所能籌辦。其中必有奸商包攬。現在該省查獲永昌洋貨鋪走私一案。此案鋪戶外假販買貨物為名。陰實以走私為業。即與黨口無異。凡紋銀出洋。總由黨口包兌包送。該奸商惟利是圖。罔顧法紀。實堪痛恨。應令該督撫明查暗訪。窮其巢穴所在。悉數按治。一經破案。即將家產查抄入官。以昭炯戒。凡此皆弊源所在。必應及時辦理。以期力挽頹風。

戊午

諭軍機大臣等。前因沿海各口岸紋銀出洋。於國計民生大有關

繫。夢經降旨。令各省督撫認真查辦矣。本日復據給事中黎攀  
鏐奏稱。暎咭喇國有躉船十餘隻。自道光元年起。即入急水門。  
至十三年。遂由急水門改泊金星門。鴉片之入口。紋銀之出口。  
恃有躉船為遁逃淵藪。匪徒快蟹。朝發夕至。各處港汊。可以偷  
越。又窰口奸商。包克包送。該省洋貨鋪戶。外假販買貨物為名。  
陰以走私為業。即與窰口無異等語。外夷船隻停泊。自有定所。  
何以道光元年以前。未聞私設躉船。近年則任其終歲在洋停  
泊。以致奸民與之勾通。任其偷漏。著責成該督等。嚴飭洋商傳  
諭該國坐地夷人。勒令寄泊躉船。盡行歸國。無許託故逗留。並  
確查窰口巢穴所在。悉數按治。毋稍姑息。以塞弊源。而挽頹風。

原摺著鈔給閱看將此諭知鄧廷楨祁墳並傳諭文祥知之

七月丙申閩浙總督鍾祥福建巡撫魏元烺福州副都統張仙保福建水師提督陳化成奏竊查噶咭喇夷情詭譎前於道光十五年由海面游奕到閩致動槍礮驅逐臣等預事防維疊經諭飭沿海文武凡遇夷船進口總須曉以理法示以兵威立即押逐遠去不容玩抗亦無許各該文武稍有輕躁畏憚致滋貽誤本年五月二十七日有夾板夷船一隻仍與從前各年所來之船無異在於閩安鎮外五虎外洋飄駛經閩安護副將周廷祥等攔阻該船即行停泊另將拴帶小船三隻撥令夷官夷丁並水手人等三

船計共三十六名。人口投稟。該護副將等見其船小人少。情形恭順。未用槍礮阻禦。派令哨船跟同進口。於五月二十八日。行至福州府閩縣頭墩海面停住。臣等聞信。即經派委文武酌帶水陸各兵。前往豫備查逐。經督標中軍副將博勒恭武。福州府知府戴嘉穀等。連夜駛至港口南臺。派弁兵前往夷船查詢。該夷稱有難夷飄流至閩。請交給帶回歸國。該副將等將夷帶至近岸廟內。詢據帶有稟帖一封。欲呈總督批示。該副將擲發不收。再三懇請。該將該守折看稟詞。恭順接收。臣鍾祥與撫臣暨副都統等查看夷稟。係為上年七月。有漳浦縣收獲海面遭風難夷稟請。

將難夷交給自帶回國等情。臣等查海面難夷應行照例譯訊護送赴粵轉令回國。夷情狡譎。是否該國被難之人均難查考。本不准徑行交給帶回。所有該夷稟請帶回之處。自應照例駁飭。至夷稟內敘述該難夷同船犯有命案之事。現經呂宋緝辦是否虛實。臣等更不便稍為置議。當將該夷稟內並未指出難夷姓名。暨譯訊難夷亦未供係該國之人。明白諭示。俾知不能任其欺混。仍將閩省海口暨迤北各省均不准該夷停泊之處。明白諭飭。俾不敢藉稟為詞。混思游奕。臣鍾祥仍飭效力世襲男爵邱聯恩奉持令箭。飭催各官一俟示諭到時。即刻飭令該小船趕歸。

大船一齊起碇不准片刻停留該夷船於五月三十日接到傳諭即刻遵照啟行開往東南大洋而去並無停留違抗該夷原稟經各文武遵照臣等諭飭交還收領而該夷臨行之時又復暗置廟內桌下應俟解送難夷業完銷燬臣等仍飭沿海水師跟押不准回棹北向查詢該夾板夷船一隻拴帶小船四隻安設銅礮十數位夷官隨從各數名水手人等共數十名為首夷官名肱經文武各官拘住空廟不令乘間售賣物件其兩日所需飯食由官賞給不准與民交易一切尚均嚴肅

諭軍機大臣等據鍾祥等奏稱暎咭喇國夷官名肱以小船三隻



入口投稟請將遭風難夷交給帶回經該督等明白諭示飭令  
趕歸大船一齊起碇不准片刻停留該船開往東南大洋而去  
並無違抗等語所辨甚是。嗾咭喇夷情詭譎膽敢撥用小船進  
口遞稟以請給難夷為詞雖情形恭順一經諭飭遵照啟行而  
臨行復將原稟暗置廟內桌下其鬼蜮伎倆已可概見難保其  
日後不再生希冀該督等惟當嚴飭沿海文武員弁隨時認真  
查察設該夷船復有似此藉詞入口者倘竟不服驅逐即當懾  
以兵威俾知天朝例禁綦嚴不容抗玩即或外託恭順卑詞懇  
求亦當以理拒之不得稍有遷就致釀事端是為至要

九月戊戌兩廣總督鄧廷楨廣東巡撫祁墳粵海關監督

文祥奏竊臣於七月初三日承准軍機大臣字寄道光十七年六月十二日奉

上諭據給事中黎攀鏐奏稱暎咭喇國有躉船十餘隻自道光元年起即入急水門至十三年遂由急水門改泊金星門鴉片之入口攸銀之出口恃有躉船為遁逃淵藪又窰口奸商包兌包送該省洋貨舖戶外假販買為名陰以走私為業即與窰口無異等語外夷船隻停泊自有定所何以道光元年以前未聞私設躉船近年則任其終歲在洋停泊以致奸民勾通任其偷漏著責成該督等嚴飭洋商傳諭該國坐地夷人勒令寄泊躉船盡行歸國並確查窰口巢穴所在悉數按治等因欽此仰見

聖主釐剔弊源之至意。臣等伏查鴉片煙土。本為外夷藥材。初與洋貨同載稅冊。迨後嚴申厲禁。販賣買食。定有治罪專條。而夷運未能遏絕。馴至毒流遠邇。耗竭紋銀。實為中國之患。從前啖咭喇與各國貨船抵粵。皆寄碇於零丁等處洋面。以待引水入口。並無躉船之名。嗣有將船囤貯鴉片洋貨。冀圖乘間走私者。人遂以躉船目之。大率啖咭喇港脚味喇啞三處之船居多。歷經隨時驅逐。往往去而復來。近年藉詞避風。貨船躉船。遂於每年南風將旺之時。駛入金星門內洋停泊。民夷勾結。弊竇愈滋。臣鄧廷楨於道光十五年臘底到任後。經臣祁項告悉情形。會同籌議。堵禁十

六年九月中旬業已全數退出。因恐其仍萌故智。復於上年冬間。先行傳諭洋商。並於金星門一帶出示嚴禁。本年春間。咨會水師提督。臣關天培。派調巡洋舟師。及該管香山協縣。在於金星門內實力防範堵截。仍先事密備大船。預為火攻之計。俾其聞風知懼。自嚴禁之後。至今金星門並無片帆駛至。現擬於今冬明春。仍守成規辦理。此臣等實力堵擊。暨金星門夷船絕跡之實在情形也。茲復奉諭旨飭令開行。臣等當即欽遵。諭飭洋行總商伍紹榮等。剴切傳諭。喚咭喇國領事夷人義律。以躉船久泊各洋。既犯

天朝之禁令。復違該國之教條。

大皇帝恩流中外。仁洽寰瀛。欲除內匪之勾通。必杜奸夷之煽誘。

方今

聖諭嚴明。必當認真查辦。該領事務即欽遵。

諭旨。將零丁等處洋面寄泊躉船。概行遣令回國。毋許仍前寄泊。逗留。嗣後除貿易正項貨物商船外。所有一切違禁貨物。如鴉片煙土之類。俱不准販運重來。況查粵東港口。

天朝恩准通商。銷貨置貨。實為海內港口之冠。各國夷商遠涉重洋。自應專守正經貿易。若違禁牟利。任意逗留。

大皇帝震疊懷柔。兼施並用。必致自絕通商之路。該領事人尚曉事。自必預慮及此。慎勿坐令躉船負固。抗違法令等語。並

飭該總商一俟各躉船開行回國即行稟報查考如敢遷延。巨等再當相度機宜酌量辦理至躉船之日久淹留使無窩口走私諸匪以濟其奸亦安能恣為鬼蜮先經巨等於上年專委署督標中軍副將韓肇慶揀派守備戴文彪千總蔣大彪倫朝光督令會同委員試用知縣蔣立昂候補經歷彭邦晦廣購眼鏡先後拏獲販運紋銀開設快蟹艇館及鋪戶游民走私各案七起現在快蟹一項業已盡淨但此外蝦筍拖風等艇駕駛亦稱迅捷且有各項民船潛於海口接載私貨現又連賊續獲鴉片匪犯岑正興等一起即係香山渡船是走私匪艇名目尚多實與窩口奸

徒均屬難容恣肆。現已飛飭各該管道府標鎮協營嚴督所屬文武舟師一體巡緝。並責成該副將韓肇慶會督原派委員隨處明查暗訪。有犯即拏。惟紋銀之出。鴉片之入。洋貨之偷越漏稅。其交易多在躉船窮源溯流。是零丁等處洋面。尤為扼要之所。該管之香山協大鵬營及水師提標左營。臺汛星羅碁布。舟師梭織遊巡。誠能實力查拏。縱不能弭躉船之來蹤。亦何難斷匪艇之去路。查虎門逼近沙角。實為出入咽喉。是以特設水師提督。在於該處駐劄。統轄全洋。事權既專。責任綦重。臣等現經咨會提臣關天培。探索弊端。破除積習。就近督飭該協營將備率令汛弁。

舟師無分雨夜加勁巡查禁泚無論內地何項艇隻不許攏近躉船亦不許無故在洋遊奕一遇走私匪艇奮勇兜擒解省嚴究其窩口巢穴所在密速掩捕查抄盡法懲辦如該協營在事人員等及各屬文武各員弁玩不用命致有縱漏別經發覺或被委員拏解即究明本犯開窩何處何日出洋經由何縣營轄境內立將不行查拏之所管所巡員弁兵役分別叅劾治罪儻有得規包庇受賄費放甚或比匪反為之用俱照本犯罪名加等問擬仍計贓從重論以昭炯戒失察之本管上司叅處示儆其有實在出力員弁能將窩口走私各匪源源報獲或拏獲贓重大案一



起除紋銀貨物全數充賞外亦即據實保奏請

旨量加鼓勵似此信賞必罰使之畏罪圖功庶可漸收成效如有  
開口丁役勾串扶同即由臣文祥拏解重懲不敢稍涉瞻  
徇又粵洋四通八達該躉船設因防逐較嚴改由他途駕  
駛非獨惠潮一帶洋面恐其潛往且難保不乘風徑入閩  
洋則其為患易地皆然不可不兼為籌慮臣現已嚴飭惠  
潮各營常川巡防驅逐毋得片刻容留並飛咨閩浙督撫  
臣飭屬交相堵逐用昭周密

諭內閣鄧廷楨等奏諭逐躉船並籌議窩口走私章程一摺粵省  
紋銀出洋必當弭躉船之來蹤斷匪艇之去路現據該督等咨

會提督關天培破除積習。督飭所屬認真巡查禁阻。無論內地何項艇隻。不許攏近。躉船亦不許無故在洋遊奕。一遇走私匪艇奮勇兜擒。解省嚴究。其窩口巢穴所在。密速掩捕。查抄盡法懲辦。如在事人等玩不用命。致有縱漏。一經發覺。即究明開窩出洋。經由處所將該員弁兵役分別叅劾治罪。儻敢得規包庇受賄賣放。甚或比匪反為之用。俱照本犯罪名加等從重問擬。以昭炯戒。失察各上司一併叅處示儆。其有實在出力員弁。能源源報獲。或拏賊重大案。亦即據實保奏。量加鼓勵。如有關口丁役勾串扶同。著即拏解重懲。無許稍涉瞻徇。至粵洋四通八達。該躉船設因防逐較嚴。改由他途駕駛。不獨惠潮一帶洋面。

恐其潛往且難保其不乘風徑入閩洋著該督等嚴飭惠潮各營常川巡防驅逐毋許片刻容留並著閩浙總督福建巡撫飭屬一體堵逐毋稍疏縱

諭軍機大臣等鄧廷楨等奏諭逐躉船並籌拏辦窩口走私章程一摺據奏嘆咭喇等國躉船貨船近年藉詞避風駛入內洋現已諭飭洋商傳諭該國領事將零丁等處洋面寄泊躉船概行遣令回國毋許仍前寄泊逗留並飭總商等俟躉船開行回國即行稟報查考其快蟹一項業已盡淨而走私匪船名目尚多實與窩口奸徒均屬難容恣肆已飭道府標鎮協營嚴督所屬巡邏查緝等語夷船停泊內洋勾結偷漏為粵省之積弊該督等

諭飭以後該夷領事是否遵奉現在躉船曾否開行務須確實查明令其全數回國無稍逗留如敢將就了事日後經朕訪聞或被人糾參朕惟該督等是問至各項走私船隻尤須設法嚴拏期於根株淨絕亦不得因偶有獲案遂謂驅除已盡仍貽弊竇也將此諭知鄧廷楨祁墳並傳諭文祥知之